

LA TARASCA



Association pour l'Enseignement de la Langue d'Oc

--- Març de 2023 ---

Lei cent ans de Robèrt Lafont



Photo © Georges Souche

L'òme qu'a lo pus marcat au XX^e siècle tot lo moviment qu'espèra donar un avenir a nòstra lenga es naissut a Nimes lo 16 de Març 1923. Mai un Provençau, adonc, e lo solet que si pòske comparar a Mistral dins lo siècle d'avans. Encara mai qu'eu a suscitad tambèn de passiens contradictòris, mai degun pòu negar ni l'eiccionala qualitat de son òbra ni lo vam qu'a donat a la dinamica militanta, siegue pèr si metre darrier sa bandiera, siegue pèr li resistir en rejoyenissènt de biais tradicionaus que penequejavon.

Dins un relarg monte la lenga eiretada es estada cochada de totei leis òutis dau poder politique, inteleituau e culturau, fau aguer la fòrça de tot reconquistar au pus aut nivèu. Robèrt Lafont s'es fach lingüista en mestrejant coma degun l'occitan dins tota sa varietat, e mai en s'apoderant deis aisinas de la lingüistica modèrna pèr s'atacar a totei lei domènis de la lenga. Dau Felibrige monte a fach sei promiers pas a conservat la mestriè perfèta de la lenga de Mistral e de son biais de l'escriure,

e tambèn lo respèt de son apòrt magistrau a la causa. S'es fach poèta, s'es fach romancier, s'es fach dramaturge, e es en tant qu'escrivan autant qu'erudit qu'a esrich sus totei lei periòdas e totei lei gènres de la literatura occitana, en posquèt meme se permetre l'audaci de nen porgir mé Crestian Anatole la soleta sintèsi d'ample que s'es aujat de publiar.

Engajat a vint ans dins la Resistènci, Robert Lafont anava pas s'acantonar dins la vida pasible d'un universitari e d'un cercaire. La societat occitana contemporana a trovat en eu un analista d'una rara pertinènci, apielada sus una conoissènça fonsa de son istòri. L'a traducha dins sa produccion profusa de libres, d'assais, d'articles, e dins son ativitat inalassabla pèr expandir sa refleissien dins un dialògue permanent mé sei partenaris au nivèu de la França e de l'internacionau, dins son ròle de militant associatiu e dins son engajament politique.

Mai d'un òumagi si prepara pèr onorar sa memòri. Un dei pus importènts es previst lo jorn aniversari de sa naissènça au Centre internacionau de recèrca e de documentacion occitana de Besièrs mé la presentacion de l'esposicion « Robert Lafont : le roman de la langue ». Lo Centre regionau d'Estudis Occitans de Provença nen prepara tambèn una, que si tendrà as Ais, e que l'AELOC vos n'avisarà.

En 2007, Robert Lafont a reçut pèr son òbra lo Grand Pres Literari de Provença a Ventabren. Tròup empachat pèr sa malautiè, a pas poscut faire lo desplaçament despuei Florença monte viviè pròchi l'escrivana e cercaira Fausta Garavini. Mai aviè preparat son discors qu'a legit Sèrgi Bec : un de sei darniers esrichs qu'a intitulat « Laus de Provença », e qu'a consacrat a enaurar sa tèrra natala. L'anava quitar lo 24 de junh 2009.

Alan Barthélemy-Vigouroux

Bulletin intérieur distribué gratuitement aux adhérents, parution trois fois par an.

*Imprimé avec l'aide du CONSEIL DÉPARTEMENTAL 13 et du CONSEIL RÉGIONAL SUD-PACA
L'AELOC est affiliée à la FELCO et aux AIL, contacts : oebmestre@aeloc.fr web : <http://www.aeloc.fr>*